

边裔典

邊裔典第一百二十九卷

契丹部彙考

北魏

獻文帝皇興二年契丹始遣使入貢 按魏書獻文帝本紀皇興二年四月契丹遣使朝獻 按契丹傳契丹國在庫莫奚東異種同類俱竄於松漠之間登國中國軍大破之遂逃迸與庫莫奚分背經數十年稍滋蔓有部落於和龍之北數百里多爲寇盜眞君以來求朝獻歲貢名馬顯祖時使莫弗紇何辰奉獻得班鑾於諸國之未歸而相謂言國家之美心皆忻慕於是東北羣狄聞之莫不思服悉萬丹部何大何部伏弗郁部羽陵部日連部匹紮部黎部吐六于部等各以其名馬文皮入獻天府遂求爲常皆得交市於和龍密雲之間貢獻不絕

孝文帝延興三年四月契丹遣使朝貢

延興四年九月契丹遣使朝獻

延興五年契丹遣使獻名馬

承明元年九月契丹遣使朝獻 按以上魏書孝文帝本紀云云

太和三年契丹莫弗賀等求內附 按魏書孝文帝本紀太和三年九月契丹遣使朝獻 按契丹

本傳太和三年高句麗竊與蠕蠕謀欲取地豆于以分之契丹懼其侵軼其莫弗賀勿于率其部落
車三千乘衆萬餘口驅徙雜畜求入內附止於白狼水東自此歲常朝貢後告饑高祖矜之聽其入

關市糴

太和十九年五月契丹遣使朝獻 按魏書孝文帝本紀云云

宣武帝永平元年契丹國遣使朝獻

永平二年七月契丹國遣使朝獻

永平三年六月契丹國遣使朝貢

永平四年七月契丹國遣使朝獻

延昌三年九月契丹國遣使朝貢 按以上魏書宣武帝本紀云云

孝明帝熙平二年契丹入貢詔賜以青氍 按魏書孝明帝本紀熙平二年二月契丹國遣使朝獻

按契丹本傳世宗肅宗時恆遣使貢方物熙平中契丹使人祖真等三十人還靈太后以其俗嫁娶之際以青氍爲上服人給青氍兩匹賞其誠款之心餘依舊式朝貢至齊受禪常不絕

正光五年十二月契丹國遣使朝貢 按魏書孝明帝本紀云云

出帝太昌元年六月契丹國遣使朝貢

永熙三年夏四月契丹國遣使朝貢 按以上魏書出帝本紀云云

孝靜帝天平二年三月契丹國遣使朝貢 按魏書孝靜帝本紀云云

隋

文帝開皇四年契丹內附 按隋書文帝本紀開皇四年五月癸酉契丹主莫賀弗遣使請降九月庚午契丹內附 按契丹本傳契丹之先與庫莫奚異種而同類並爲慕容氏所破俱竄於松漠之間其後稍大居黃龍之北數百里其俗頗與靺鞨同好爲寇盜父母死而悲哭者以爲不壯但以其屍置於山樹之上經三年之後乃收其骨而焚之因酹而祝曰冬月時向陽食若我射獵時使我多得豬鹿其無禮頑囂於諸夷最甚當後魏時爲高麗所侵部落萬餘口求內附止白貌河後爲突厥

所逼又以萬家寄於高麗開皇四年率諸莫賀弗來謁

開皇五年契丹款塞 按隋書文帝本紀開皇五年夏四月甲午契丹主多彌遣使貢方物 按契

丹本傳開皇五年悉其衆款塞高祖納之聽居其故地

開皇六年契丹諸部相攻擊帝使責讓之 按隋書文帝本紀不載 按契丹本傳開皇六年其諸

部相攻擊久不止又與突厥相侵高祖使使責讓之其國遣使詣闕頓顙謝罪其後契丹別部出伏

等背高麗率衆內附高祖納之安置於渴奚那頡之北

開皇十三年春正月乙巳契丹遣使貢方物 按隋書文帝本紀云云

開皇二十年契丹別部來降 按隋書文帝本紀不載 按契丹本傳開皇末其別部四千餘家背

突厥來降上方與突厥和好重失遠人之心悉令給糧還本敕突厥撫納之固辭不去部落漸衆遂

北徙逐水草當遼西正北二百里依託紇斤水而居東西互五百里南北三百里分爲十部兵多者

三千少者千餘逐寒暑隨水草畜牧有征伐則酋帥相與議之興兵動衆合符契突厥沙鉢略可汗

遣吐屯潘埒統之

煬帝大業元年契丹寇營州詔韋雲起討之 按隋書不載 按唐書韋雲起傳大業初契丹寇營州詔雲起護突厥兵討之啟民可汗以二萬騎受節度雲起使離爲二十屯屯相聯絡四道並引令曰鼓而行角而止非公使毋走馬三喻五復之旣而紇斤一人犯令卽斬以徇於是突厥酋長入謁者皆膝而進莫敢仰視始契丹事突厥無間且不虞雲起至旣入境使突厥給云詣柳城與高麗市易敢言有隋使在者斬契丹不疑因引而南過賊營百里夜還陣以遲明掩擊之獲契丹男女四萬以女子及畜產半賜突厥男子悉殺之以餘衆還帝大喜會百官於廷曰雲起將突厥兵平契丹以奇用師有文武才朕自舉之拜治書御史

唐

高祖武德 年契丹遣人來朝 按唐書高祖本紀不載 按契丹本傳契丹本東國種其先爲匈奴所破保鮮卑山魏青龍中部酋比能稍桀驁爲幽州刺史王雄所殺衆遂微逃潢水之南黃龍之北至元魏自號曰契丹地直京師東北五千里而贏京距高麗西奚南營州北靺鞨室韋阻冷陁山以自固射獵居處無常其君大賀氏有勝兵四萬析八部臣於突厥以爲俟斤凡調發攻戰則諸部

畢會獵則部得自行與奚不平每鬪不利輒遁保鮮卑山風俗與突厥大抵略侔死不墓以馬車載尸入山置於樹顛子孫死父母旦夕哭父母死則否亦無喪期武德中其大酋孫敖曹與靺鞨長突地稽俱遣人來朝而君長或小入寇邊後二年君長乃遣使者上名馬豐貂

太宗貞觀二年契丹摩會來降 按唐書太宗本紀不載 按契丹本傳貞觀二年摩會來降突厥頡利可汗不欲外夷與唐合乃請以梁師都易契丹太宗曰契丹突厥不同類今已降我尚可索耶師都唐編戶盜我州部突厥輒爲助我將禽之誼不可易降者明年摩會復入朝賜鼓纛由是有常貢

貞觀十九年契丹曲據率衆歸窟哥舉部內屬 按唐書太宗本紀不載 按契丹本傳帝伐高麗

悉發酋長與奚首領從軍帝還過營州盡召其長窟哥及老人差賜繒綵以窟哥爲左武衛將軍大酋辱紇主曲據又率衆歸卽其部爲元州拜曲據刺史隸營州都督府未幾窟哥舉部內屬乃置松漠都督府以窟哥爲使持節十州諸軍事松漠都督封無極男賜氏李以達稽部爲峭落州紇便部爲彈汗州獨活部爲無逢州芬間部爲羽陵州突便部爲日連州芮奚部爲徒河州墜斤部爲萬丹

州伏部爲匹黎赤山二州俱隸松漠府卽以辱紇主爲之刺史

高宗顯慶五年五月定襄都督阿史德樞賓爲沙磧道行軍總管以伐契丹十二月阿史德樞賓及契丹戰敗之 按唐書高宗本紀云云

中宗嗣聖十三年

即武后萬歲通天元年

夏五月契丹首領松漠都督李盡忠歸誠州刺史孫萬榮陷營州殺

都督趙文翽乙丑左鷹揚衛將軍曹仁師右金吾衛大將軍張元遇左威衛大將軍李多祚司農少卿麻仁節等擊之 按唐書武后本紀萬歲通天元年五月壬子契丹首領松漠都督李盡忠歸誠

州刺史孫萬榮陷營州殺都督趙文翽乙丑左鷹揚衛將軍曹仁師右金吾衛大將軍張元遇左威衛大將軍李多祚司農少卿麻仁節等擊之八月丁酉張元遇曹仁師麻仁節等及契丹戰于黃摩谷敗績執元遇仁節九月庚子同州刺史武攸宜爲清邊道行軍大總管以擊契丹十月辛卯契丹寇冀州刺史陸寶積死之 按契丹本傳窟哥死與奚連叛行軍總管阿史德樞賓等執松漠都督

阿卜固獻東都窟哥有一孫曰枯莫離爲左衛將軍彈汗州刺史封歸順郡王曰盡忠爲武衛大將軍松漠都督而敖曹有孫曰萬榮爲歸誠州刺史於是營州都督趙文翽驕沓數侵侮其下盡忠等

皆怨望萬榮本以侍子入朝知中國險易挾亂不疑卽共舉兵殺文翽盜營州反盡忠自號無上可汗以萬榮爲將縱兵四略所向輒下不重挾衆數萬妄言十萬攻崇州執討擊副使許欽寂武后怒詔鷹揚將軍曹仁師金吾大將軍張元遇右武衛大將軍李多祚司農少卿麻仁節等二十八將擊之以梁王武三思爲榆關道安撫大使納言姚璿爲之副更號萬榮曰萬斬盡忠曰盡滅諸將戰西硤石黃麋谷王師敗績元遇仁節皆爲虜禽進攻平州不克敗書聞后乃以右武衛大將軍建安王武攸宜爲清邊道大總管擊契丹募天下人奴有勇者官畀主直悉發以擊虜萬榮銜枚夜襲檀州清邊道副總管張九節募死亡數百薄戰萬榮敗而走山俄而盡忠死突厥默啜襲破其部萬榮收散兵復振使別將駱務整何阿小入冀州殺刺史陸寶積掠數千人

嗣聖十四年

即武后神功元年

夏四月右金吾衛大將軍武懿宗爲神兵道行軍大總管以討契丹敗之

按唐書武后本紀神功元年四月癸未右金吾衛大將軍武懿宗爲神兵道行軍大總管及右豹韜衛將軍何迦密以擊契丹五月癸卯婁師德爲清邊道行軍副大總管右武衛將軍沙吒忠義爲清邊中道前軍總管以擊契丹 按契丹本傳武后聞盡忠死更詔夏官尙書王孝傑羽林衛將軍蘇

宏暉率兵十七萬討契丹戰東硤石師敗孝傑死之萬榮席已勝遂屠幽州攸宜遣將討捕不能克乃命右金吾衛大將軍河內郡王武懿宗爲神兵道大總管右肅政臺御史大夫婁師德爲清邊道大總管右武衛大將軍沙吒忠義爲清邊中道前軍總管兵凡二十萬擊賊萬榮銳甚鼓而南殘瀛州屬縣恣肆無所憚於是神兵道總管楊元基率奚軍掩其尾契丹大敗獲何阿小降別將李楷固駱務整收仗械如積萬榮委軍走殘隊復合與奚搏奚四面攻乃大潰萬榮左馳張九節爲三伏伺之萬榮窮與家奴輕騎走潞河東憊甚臥林下奴斬其首九節傳之東都餘衆潰攸宜凱而還后喜爲赦天下改元爲神功

嗣聖十七年

即武后久視元年

詔左玉鈐衛大將軍李楷固等討契丹破之按唐書武后本紀不載按

契丹本傳契丹不能立遂附突厥久視元年詔左玉鈐衛大將軍李楷固右武威衛將軍駱務整討契丹破之此兩人皆虜善將嘗犯邊數窘官軍者也及是有功

元宗開元二年正月并州節度大使薛訥同紫微黃門三品以伐契丹按唐書元宗本紀云云

按契丹本傳開元二年盡忠從父弟都督失活以默啜政衰率部落與頡利發伊健啜來歸元宗賜

丹書鐵券後二年與奚長李大酺皆來詔復置松漠府以失活爲都督封松漠郡王授左金吾衛大將軍仍其府置靜析軍以失活爲經略大使所統八部皆擢其酋爲刺史詔將軍薛泰爲押蕃落使督軍鎮撫帝以東平王外孫楊元嗣女爲永樂公主妻失活明年失活死贈特進帝遣使弔祠以其弟中郎將娑固襲封及所領明年娑固與公主來朝宴賚有加

開元四年契丹來降 按唐書元宗本紀開元四年八月辛未契丹降 按契丹本傳有可突于者爲靜析軍副使悍勇得衆娑固欲去之未決而突于反攻娑固娑固奔營州都督許欽澹以州甲五百合奚君長李大酺兵其攻可突于不勝娑固大澹皆死欽澹懼徙軍入榆關可突于奉娑固從父弟鬱于爲君遣使者謝罪有詔卽拜鬱于松漠郡王而赦可突于鬱于來朝授率更令以宗室所出女慕容爲燕郡公主妻之可突于亦來朝擢左羽林衛將軍鬱于死弟吐于嗣與可突于有隙不能定其下攜公主來奔封遼陽郡王留宿衛可突于奉盡忠弟邵固統衆詔許襲王天子封禪邵固與諸蕃長皆從行在明年拜左羽林衛大將軍徙王廣化郡以宗室出女陳爲東華公主妻邵固詔官其部酋長百餘人邵固以子入侍可突于復來不爲宰相李元紘所禮鞅鞅去張說曰彼獸心者唯

利是向且方持國下所附也不假以禮不來矣

開元八年九月壬申契丹寇邊王峻檢校幽州都督節度河北諸軍大使黃門侍郎韋抗爲朔方道行軍大總管以伐之 按唐書元宗本紀云云

開元二十年正月信安郡王禕爲河東河北道行軍副元帥以伐契丹五月俘奚契丹以獻 按唐書元宗本紀開元二十年正月乙卯信安郡王禕爲河東河北道行軍副元帥以伐奚契丹三月己巳信安郡王禕及奚契丹戰于薊州敗之五月戊申忠王浚俘奚契丹以獻 按契丹本傳可突于殺邵固立屈烈爲王脇奚衆共降突厥公主走平盧軍詔幽州長史知范陽節度事趙含章擊之遣中書舍人裴寬給事中薛偁大募壯士拜忠王浚河北道行軍元帥以御史大夫李朝隱京兆尹裴仲先副之帥程伯獻張文儼宋之悌李東蒙趙萬功郭英傑等八總管兵擊契丹旣又以忠王兼河東道諸軍元帥王不行以禮部尙書信安郡王禕持節河北道行軍副元帥與含章出塞捕虜大破之可突于走奚衆降王以二蕃俘級告諸廟

開元二十一年閏月幽州副總管郭英傑及契丹戰於都山英傑死之

開元二十二年張守珪及契丹戰敗之殺其王屈烈 按以上唐書元宗本紀云云 按契丹本傳可突于盜邊幽州長史薛楚玉副總管郭英傑吳克勤烏知義羅守忠率萬騎及奚擊之戰都山下可突于以奚厥兵來奚懼持兩端衆走險知義守忠敗英傑克勤死之殺唐兵萬人帝擢張守珪爲幽州長史經略之守珪旣善將可突于恐陽請臣而稍趨西北倚奚厥其衙官李過折與可突于內不平守珪使客王悔陰邀之以兵圍可突于過折卽夜斬可突于屈烈及支黨數十人自歸守珪使過折統其部函可突于等首傳東都拜過折北平郡王爲松漠都督可突于殘黨擊殺過折屠其家一子刺乾走安東拜左驍衛將軍 按張守珪傳守珪徙幽州長史河北節度副大使俄加採訪處置等使契丹奚連年梗邊牙官可突于胡有謀者前長史趙含章薛楚玉等不能制守珪至每戰輒勝虜遂大敗帝喜詔有司告九廟契丹曾屈刺及突于恐懼乃遣使詐降守珪得其情遣右衛騎曹王悔詣部計事屈刺無降意徙帳稍西北密引奚厥衆將殺悔以叛契丹別帥李過折與突于爭權不叶悔因間誘之夜斬屈刺及突于盡滅其黨以衆降守珪次紫蒙州大閱軍實賞將士傳屈刺突于首於東都

開元二十五年張守珪討契丹敗之 按唐書元宗本紀開元二十五年三月乙酉張守珪及契丹戰于捺祿山敗之 按契丹本傳開元二十五年守珪討契丹再破之有詔自今戰有功必告廟
天寶四載契丹大會降以靜樂公主妻之 按唐書元宗本紀天寶四載三月以外孫獨孤氏女爲靜樂公主嫁于契丹松漠都督李懷節楊氏女爲宜芳公主嫁于奚饒樂都督李延寵 按契丹本傳天寶四載契丹大會李懷秀降拜松漠都督封崇順王以宗室出女獨孤爲靜樂公主妻之是歲殺公主叛去范陽節度使安祿山討破之更封其酋楷洛爲恭仁王代松漠都督
天寶十載八月范陽節度副大使安祿山及契丹戰于吐護真河敗績 按唐書元宗本紀云云
按契丹本傳祿山方幸表討契丹以向帝意發幽州雲中平盧河東兵十餘萬以奚爲鄉導大戰潢水南祿山敗死者數千自是祿山與相侵掠未嘗解至其反乃已

天寶十四載三月壬午安祿山及契丹戰于潢水敗之 按唐書元宗本紀云云

武宗會昌二年契丹內附 按唐書武宗本紀不載 按契丹本傳契丹在開元天寶間使朝獻者無慮二十故事以范陽節度爲押奚契丹使自至德後藩鎮擅地務自安障戍斥候益謹不生事於

邊奚契丹亦鮮入寇歲選酋豪數十入長安朝會每引見賜與有秩其下率數百皆駐館幽州至德寶應時再朝獻大曆中十三貞元間三元和中七太和開成間凡四然天子惡其外附回鶻不復官爵渠長會昌二年回鶻破契丹酋屈戌始復內附拜雲麾將軍守右武衛將軍於是幽州節度使張仲武爲易回鶻所與舊印賜唐新印曰奉國契丹之印

懿宗咸通 年契丹遣使入朝 按唐書懿宗本紀不載 按契丹本傳咸通中其王習爾之再遣使者入朝部落寢彊習爾之死族人欽德嗣

僖宗光啟 年契丹敗約入寇劉守光僞與和帳飲具于野伏發禽其大將 按唐書僖宗本紀不

載 按契丹本傳光啟時方天下盜興北疆多故乃鈔奚室韋小小部種皆役服之因入寇幽薊劉仁恭窮師踰摘星山討之歲燎塞下草使不得留牧馬多死契丹乃乞盟獻良馬求牧地仁恭許之復敗約入寇劉守光戌平州契丹以萬騎入守光僞與和帳飲具于野伏發禽其大將羣胡慟願納馬五千以贖不許欽德輸重賂求之乃與盟十年不敢近邊欽德晚節政不競其八部大人法常三歲代時耶律阿保機建鼓旗爲一部不肯代自號爲王而有國大賀氏遂亡

圖考

按三才圖會黑契丹有城池人烟金人馬曾至此至應天府馬行一年

契丹部藝文

敕契丹都督涅禮書

唐張九齡

勅契丹都督涅禮往者屈突于兇惡無心憂矜百姓背叛于我將日自防丁壯不得耕耘牛馬不得生養及依附突厥而課稅又多部落吁嗟卿所見也李過折因衆人之忿誅頑兇之徒諸部落酋豪相率歸我已令人隨事賞賜亦云且得安寧過折封王豈直賞功而已亦爲百姓衆意賴其撫存不知近日以來若爲非理亦聞殺害無罪捧打又多衆情不安遂致非命然卿彼之蕃法多無義于君長自昔如此朕亦知之然是卿蕃王有惡輕殺爲此王者不亦難乎但恐卿今爲王後人亦常不自保誰願作王卿雖蕃人是當土豪傑亦須防慮後事豈取快志目前過折旣亡卿初知都督百姓諸處復又安寧以否守珪先擬往彼亦卽令便就處置卿應有官賞卽有處分夏中甚熱卿及首領百姓并平安好今賜卿錦衣一副并鈿帶七事至宜領取遣書指不多及